

- प्रधानमंत्री नरेंद्र मोदी जपान जात्तरा दरान 15में भारत-जपान सालाना शिखर सम्मेलन च शामिल होडन। श्री मोदी अज्ज रातीं जपान ते चीन दी 2 दिनें दी जात्तरा पर रवाना होडन।
- प्रधानमंत्री होरें आखेआ, प्रधानमंत्री जन-धन योजना नै वित्तीय समावेशिता दे माध्यम कन्नै सशक्तिकरण करियै देसै दे लोकें दा जीन बदली दिता ऐ।
- चुनांऽ आयोग नै अज्ज नमीं दिल्ली च सी.पी.आई दे मिम्बरें दे इक डेलीगेशन कन्नै गल्लकत्थ कीती।
- रूसी राष्ट्रपति व्लादिमीर पुतिन ते उत्तर कोरिया दे Kim Jong UN चीन दी विजय दिवस परेड च शामिल होडन।
- भारती ग्रैंडमास्टर आर प्रगणानंदा नै अमरीका च खेड्डी जा'रदी ग्रैंड चेस टुअर फाइनल च अपनी थाहर पक्की करी लैती ऐ।

<><><><><><>

PM-Japan Visit

प्रधानमंत्री नरेंद्र मोदी होर अज्ज जपान दी जात्तरा लेई रवाना होडन। ओहू जपान दे प्रधानमंत्री शिगेरू इशिबा हुंदे कन्नै 15में भारत-जपान सालाना शिखर सम्मेलन च हिस्सा लैने लेई जा'रदे न। एहू प्रधानमंत्री हुंदी जपान दी 8मीं जात्तरा होग ते प्रधानमंत्री इशिबा हुंदे कन्नै एहू उं'दी पैहली शिखर गल्लबात होग। जात्तरा दे दुए गेड च प्रधानमंत्री मोदी होर चीन जाडन जित्थे ओहू 31 अगस्त थमां पैहली सितंबर तगर आयोजित होने आहले शंघाई सहयोग संगठन च हिस्सा लैडन। ओहू चीन दे राष्ट्रपति Xi Jinping हुंदे सादे पर उत्थे जा'रदे न।

<><><><><><>

PMJDY

प्रधानमंत्री जन-धन योजना दे अज्ज 11 ब'रे पूरे होई गए न। प्रधानमंत्री नरेंद्र मोदी होरें 15 अगस्त 2014 गी लाल किले दी प्राचीर परा एहू योजना शुरू करने दा ऐलान कीता हा, जेडी अज्ज दुनिया दी सब्बने शा बड्डी माली समावेशन आहली पहलकदमिं चा इक्क बनी गेदी ऐ। सोशल मीडिया दी इक पोस्ट च इस योजना बारै किश झलकियां सांझी करदे होई प्रधानमंत्री मोदी होरें इस गल्लै पर लोऽ पाई ऐ जे किस चाल्ली इस योजना नै कई लोकें गी माली तौरै पर सशक्त बनाइयै उं'दी जिंदगिं च सकारात्मक तब्दीलियां आहिनयां न। श्री मोदी होरें इस गल्ला पर जोर पाया जे जिस्सलै समाज दे भलेआं गरीब माह्नूआं गी बी माली तौरा पर सशक्त बनाया जंदा ऐ तां समूलचा राष्ट्र किट्टै रलिए अगडा बधदा ऐ। उनें आखेआ जे पी.एम-जन धन योजना नै इस लक्ष्य गी बखूबी हासिल कीता ऐ।

Import-Duty

सरकार नै कच्चे कपाहू दे आयात पर कर छूट इस बरै 30 सितंबर थमां 31 दिसंबर तगर बधाने दा फैसला कीता ऐ। इक बयान च खजाना मंत्रालय नै आखेआ जे एहू फैसला भारती कपडा उद्योग लेई कपाऽ दी उपलब्धता बधाने दे मकसद कन्नै कीता गेआ ऐ। एहूदे शा पैहलें सरकार नै कपाऽ दे आयात पर 19 अगस्त थमां 30 सितंबर तगर अस्थाई कर छूट दिती ही।

<><><><><><>

Prez. Naukhai

राश्ट्रपति द्रौपदी मुर्मू होरें ओडिशा दे नागरिकें गी नुआखाई उत्सव दी बदाई दिती ऐ। अपनी इक सोशल मीडिया पोस्ट च राश्ट्रपति मुर्मू होरें आखेआ जे एहू त्यौहार करसानें ते करसान प्रति मान-सम्मान ते आभार प्रगट करने दा इक पवित्र मौका ऐ। इस दरान पारम्परिक सम्बलपुरी लोक लाबे लाइयै लोक खुशी मनांदे ना। पच्छिम ओडिशा दे लोक नुआखाई दी बड़ी निहालप करदे ना। एहू गणेश चतुर्थी दे अगले दिन मनाया जंदा ऐ। लोक बडुलै सवेला अपने-अपने देवतें गी ताजी करी दी फसल, चौल वगैरा अर्पित करदे ना। ओडिशा च इक बरे च 13 उत्सव मनाए जंदे न जिंदे चा नुआखाई पच्छमी ओडिशा दा प्रमुख त्यौहार ऐ। इस प्रांतै च जनजातीय समुदाय दी घनी आबादी ऐ जिंदा मुख व्यवसाय करसानी ऐ।

<><><><><><>

PM-Naukhai

प्रधानमंत्री नरेंद्र मोदी होरें अज्ज नुआखाई दे मौके पर देशवासिएं गी शुभकामनां भेंट कीतियां। सोशल मीडिया पोस्ट च श्री मोदी होरें इस गल्लै पर जोर दिता जे एहू त्यौहार करसानें दे प्रति बड़ा मता एहसानमंद होने दा प्रतीक ऐ-जिंदी सखत मेहनत कन्नै सब्बनें दा ढिडु भरोचदा ऐ। उनें हर घरै च खरी सेहत, खुशहाली ते सुख-समृद्धि दी कामना बी कीती।

<><><><><><>

Terrorist-Killed

बांडीपोरा जिले दे गुरेज सैक्टर आहली कब्जा रेखा कन्नै लगदे इलाकें च सेना नै घुसपैठ दी इक कोशिश गी नाकाम बनांदे होई 2 आतंकवादिएं गी मारी मकाया ऐ। इक टकोहदी सूह पर सेना ते पुलस आसेआ सांझा अभियान चलाया गेआ ते घुसपैठ गी नाकाम कीता गेआ। श्रीनगर आधारित चिनार कोर नै इस बारै एक्स पर जानकारी दिती। सेना नै संदिग्ध नकलो-हरकत दिक्खी। सेना दे सौहगे जोआनें घुसपैठिएं गी ललकारेआ पर उस भेठा दा गोलीबारी कीती गेई जेदा सुरक्षाबलें आसेआ परता दिता गेआ। इस टाकरे च 2 आतंकवादी मारे गे।

<><><><><><>

EC-CPI

चुनांऽ आयोग नै अज्ज नमीं दिल्ली च भारती कम्यूनिस्ट पार्टी दे सदस्ये दे इक प्रतिनिधिमंडल कन्नै गल्लकत्थ कीती। मुख चुनांऽ आयुक्त ग्यानेश कुमार ते चुनां आयुक्त डॉ. सुखबीर सिंह संधू ते डॉ. विवेक जोशी होर पार्टी दे महासचिव डी. राजा हुंदे नेतृत्व च आए दे प्रतिनिधिमंडल कन्नै मिले ते उंदे मश्वरे सुने। एह मीटिंग चुनांऽ आयोग आसेआ सब्बनें राश्ट्रीय ते राज्य दिएं सियासी पार्टिं दे अध्यक्षे कन्नै गल्लकत्थ करने दे कड़ी दे सिलसिले च कीती गई। चुनांऽ आयोग दा मननदा ऐ जे इस चाल्ली दिएं सार्थक मीटिंगे कन्नै पार्टिये दे अध्यक्ष अपने मश्वरे ते चिंता सिद्धियां चुनांऽ आयोग अगगे रक्खी सकदे न।

<><><><><><>

China Victory Day Vladimir

चीन नै घोषणा कीती ऐ जे रूस दे राश्ट्रपति व्लादिमीर पुतिन ते उत्तर कोरिया दे लीडर किम जांग उन समेत वदेशे थमां 26 लीडर, 3 सितंबर गी चीन दी विजय दिवस परेड च शामिल होंगन। परेड च वदेशी लीडरे दी मौजूदगी विश्व युद्ध 2 च जपानी दबदबे दी खिलाफवर्जी दी निशानदेही करदी ऐ जे जदू टोक्यो नै विश्व दे लीडरे दा आह्वान कीता हा जे ओहू इस परेड च शामिल नेई होन कीजे एहू जपान विरोधी ऐ।

<><><><><><>

Mumbai

मुम्बई दे विरारद च कल चिरे रातीं इक चार मंजिला ईमारत दे ढोने करी 17एं लोके दी मोत होई गई ते 9 घायल होई गए। बचाव अभियान जारी ऐ। अधिकारिं दस्सेआ जे मलबे च होर लोके दे फसे होने दी शेंका ऐ। दमकल विभाग नै अजे तगर 24एं लोके गी बचाया ऐ।

<><><><><><>

AP-Rains

आंध्र प्रदेश दे केइएं हिस्से च घट्ट दबाऽ आहले इलाके दे प्रभाव कन्नै मंगलवार शा बुधवार रातीं ते अज्ज बहुलै तगर मध्यम दर्जे दी बरखा पेई। आंध्र प्रदेश दे उत्तरी तटीय जिले ते दक्खनी तटीय ते रायलसीम क्षेत्रे दे किश हिस्से च लगातार बरखा कन्नै सामान्य जीवन बुरी चाल्ली प्रभावित होआ ऐ।

<><><><><><>

HP-Rains

हिमाचल प्रदेश च मौसम विभाग नै 2 सितंबर तगर बरखा पौने दी पेशगोई कीती ऐ। बरखे जिमीं धंस्सने करी प्रभावित लोके ते चम्बा जिले च मणि महेश जात्तरा दी बत्ता फसे दे श्रद्धालुएं गी बचाने लेई राहत ते बचाव कम्म जोरे-शोरे नै चला'रदे न।

<><><><><><>

IMD

तोआई, भारती मौसम विभाग नै अज्ज छत्तीसगढ, तटीय कर्नाटक, मध्य महाराष्ट ते उत्तराखंड च भारी बरखा पौने दी पेशगोई कीती ऐ।

<><><><><><>

Bridge-Damaged

उधमपुर दे समरोली इलाके कश बंटी पुल गी कल इलाके च होई दी भारी बरखें करी खरा मता नुकसान होआ ऐ। एह पुल जिले दी 20 थमां मती पंचैतें गी आपूं'चै जोड़दा ऐ। इस इलाके दे लोकें दा आखना ऐ जे 9 ब'रे पैहले गै उनेंगी लम्मी जद्दोजहद परैंत एह पुल थहोआ हा ते हून एह रूढी गेआ ऐ। इस करी जरनैली शिड़क ते जिले तगर उंदी पुज्ज नेई रेई ऐ। इस पुल गी होए दे नुकसान करी 50 जहार दी आबादी गी मुश्कल झल्लनी पवा'रदी ऐ।

<><><><><><>

NHW-Closed

उधमपुर ते रामबन दे इलाकें च भारी बरखें करी कई थाहरें पेदिएं ल्हास-पस्सिएं दे चलदे जम्मू-श्रीनगर राश्ट्री जरनैली शिड़क अज्ज उप्परोतली त्रीए ध्याड़े बी गड्डिएं दी आओजाई लेई बंद ऐ। उधमपुर च जखैनी ते चनैनी बश्कार कई सारी थाहरें पर ल्हास-पस्सियां पौने दे चलदे 270 किलोमीटर लम्मी एह शिड़क फिलहाल बंद ऐ जिस करी कई थाहरें पर तकरीबन 500 शा 600 गड्डियां बत्ता फसी दियां ना।

<><><><><><>

SMVD-Yatra Suspended

अद् कुंवारी च ल्हास-पस्सियां पौने करी कई श्रद्धालुएं दे मारे जाने ते केइएं दे जखमी होई जाने दे बाद अज्ज उप्परोतली त्रीए ध्याड़े बी श्री माता वैशुणो देवी जी दी जात्तरा गी बंद रक्खेआ गेदा ऐ। एन.डी.आर.एफ, एस.डी.आर.एफ, पुलस ते श्राइन बोर्ड दे अमले आसेआ पूरी सरगर्मी कन्नै राहत ते बचाऽ अभियान तोढ चाढे जा'रदे ना। इस कुदरती करोपी च जखमी होए दे श्रद्धालुएं गी ईलाज लेई रियासी ते जम्मू दे अस्पतालें च मुंतकिल कीता गेदा ऐ। श्री माता वैशुणो देवी जात्तरा मार्ग पर आम ध्याड़े आहला लेखा आओ-जाई बहाल करने आस्तै सब्बे मुमकिन जत्त कीते जा'रदे ना। कटड़ा च भारी बरखा ते हाड़ जनेय हालात दे मगरा प्रभावित होए दे आम जन-जीवन ते बत्ता फसे दे वैशुणो देवी शरदालुएं दी हालत गी दिखदे होई कटड़ा होटल एसोसिएशन नै बड़ा हमदर्दी आहला रौंऽ इख्तियार करदे होई एह ऐलान कीता ऐ जे हाड़ें करियै कटड़ा च फसे दे सब्बनें शरदालुएं गी रौहने-बौहने दी मुफ्त सुविधा उपलब्ध करोआई जाग। कटड़ा होटल एसोसिएशन दे प्रधान राकेश वजीर होरें आखेआ ऐ जे कटड़ा च सब्बे होटल इस गल्ला गी यकीनी बनाडन जे इस औक्खी घड़ी दरान कुसै बी शरदालु गी कोई असुविधा पेश नेई आवै।

<><><><><><>

Dy-CM

उपमुख्यमंत्री सुरेंद्र चौधरी होंरें अज्ज जम्मू दे भगवती नगर आहले तवी नदी पर बने दे चौथे पुल गी पुजे दे नकसान दा जायजा लैने लेई व्यापक दौरा लाया। अपने दौरे दरान उनें मुतल्लका अफसरें कन्नै इसी फौरी बहाल करने लेई तरीकाकार अपनाने लेई गलाया तां जे लोकें गी आवाजाई च सौख होई सकै। उनें आखेआ जे इस बारै इक जांच करोआई जाग। इस पुल गी होए दे नुकसान करी लोकें गी आवाजाई च खासी परेशानी होआ करदी ऐ।

<><><><><><>

Scholls-Closed

खित्ते च बने दे खराब मौसम से मद्देनजर सरकारै समूलचे जम्मू-कश्मीर च औंदी 30 अगस्त तोड़ी सब्बनें सरकारी ते निजी स्कूलें गी बंद रखने दा ऐलान कीता ऐ। विद्यार्थिंणं दी सुरक्षा यकीनी बनाने लेई इक्क एहतियाती हीले दे तौरा पर एहू फैसला लैता गेआ ऐ।

<><><><><><>

Chess

भारती ग्रैंडमास्टर अरा प्रज्ञानंदा नै ग्रैंड शतरंज टुअर फाइनल्ज च थाहर पक्की करी लेयी ऐ। प्रज्ञानंदा नै सिंकफील्ड कप च उपविजेता बनियै अपनी थाहर पक्की कीती ऐ। अमरीका दे वेस्ली सो नै इस टूर्नामेंट दा खिताब जित्तेआ।

<><><><><><>

Badminton

बैडमिंटन च भारत दी शीर्ष मर्दे दी जोड़ी सात्विकसाइराज रेंकीरेड्डी ते चिराग शेटी दे कन्नै गै शीर्ष शटलर पी.वी सिंधु अज्ज पैरिस च बीडब्ल्यूएफ विश्व चैंपियनशिप 2025 दे अखीरले 16 च पुज्जी गे ना। नौमी वरीयता प्राप्त सात्विक चिरागदी जोड़ी नै चीनी ताइपे दे लियू Kvang Heng ते Yang po han गी 43एं मिनटें च 22-20, 21-13 कन्नै हराया। महिला सिंगल्स च पी.वी सिंधू नै शानदार खेड्डु दा प्रदर्शन करदे होई मलेशिया दी करूपाथेवन लेत्शाना गी 21-19, 21-15 कन्नै हराया।

<><><><><><>

Para-Athletic

अगले म्हीने होने आहली विश्व पैरा एथलेटिक्स चैंपियनशिप लेई भारती टीम दी कल घोषणा कीती गेई। चैंपियनशिप 27 सितंबर थमां 5 अक्तूबर तोड़ी नमी दिल्ली दे जवाहर लाल नेहरू स्टेडियम च आयोजित कीती जाग। भारत च पैहली बारी आयोजित होआ'रदी चैंपियनशिप च स्टार जेवलिन खडारी सुमित अंतिल दी अगुवाई च 19एं महिला खडारनें सने 73 एथलीट चैंपियनशिप च हिस्सा लै'रदे ना। 3 बारी पैरा ओलंपिक जेत्तू हाई जम्पर मरियप्पन ढंगेवालू गी टीम च शामिल नेई कीता गेआ ऐ।



Marathwada- Lord Ganesha

मराठवाडा नै पूरे जोश ते जज्बे कन्नै भगवान गणेश हुंदा सोआगत कीता। छत्रपति सम्भाजी नगर च सभ्भनें सियासी पार्टिं दे लीडरें दी मौजूदगी च पारम्परिक ग्रामदैवत संस्थान गणपति दी मूर्ति दी स्थापना ते पूजा अर्चना कीती गई। इस बरै गणेश मंडल नशीली दोआइएँ दी कवैतू दे विरोधे च पहलकदमी करा रदे ना। एहदे अलावा इक मंडल इक बूहटा प्रचार मुहिम सफाई-सुथराई पर बी गणेश मंडल कम्म करा रदे ना। नानडेड जिले च पर्यावरण अनुकूल गणेश भगवान दियां मूर्तियां डेगलूर च स्थापित कीतियां गेइयां ना। बीड जिले च 1 ज्हार 762 सार्वजनिक थाहरें पर गणेश भगवान दिएं मूर्तिं गी स्थापित कीता गेदा ऐ। गणेश उत्सव समारोहें गी व्यवस्था आहले ढंगै सिर तोड चाढने लेई पोलीस विभाग नै ढाई जहार पुलस कर्मी तैनात कीते दे ना। इस बरै लातूर जिले च शैल बरखा पौने करी करसान सुखा दा साहू लै'रदे ना।



PM-MKB

प्रधानमंत्री नरेन्द्र मोदी होर 31 अगस्त ऐतवार दिनें 11 बजे अपने माह्वार रेडियो कार्यक्रम “मन की बात” दे राएं देश-बदेश च रौहने आहले लोके कन्नै अपने बचार सांझे करडन। एहू इस कार्यक्रम दी 125मीं किशत होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नी आकाशवाणी खबरें दी वेबसाइट ते न्यूज़ ऑन ए.आई.आर मोबाइल ऐप ते डीडी न्यूज़, आकाशवाणी न्यूज़, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ मन की बात दे तुरत मगरा एहदा डोगरी च अनुवाद प्रसारत कीता जाहग जिसी तुस रातीं 8 बजे इक बारी परतियै बी सुनी सकदे ओ।

